

SEMANA DATOLUK

NU'UDAR KOMUNIDADE HILI ESTILU MORIS SAÚDAVEL NIAN: Hi'it An mai, Na'i Jezús

HALO BUAT DI'AK HO KSOLOK!

(Halakan roman esperansa, justisa no damen nian)

G: Ita hahú semana datoluk Adventu nian ho ksolok boot, iha dalan ne'ebé prepara ita ba Jezús nia moris, nia mak Maksoin. Ita la bele lakon ksolok, esperansa no entusiazmu, maski iha tempestade no solidaun ne'ebé ita bele hasoru iha moris loron-loron nian. Ohin ita sei halakan lilin korderosa, tanba ita besik ona atu hala'o ksolok ne'ebé mai husi Jezús nia moris, nia mak liurai sira nia liurai.

H: Mai lalais Na'i, kontinua atu kuda fini ksolok no konfiansa nian iha ami-nia moris, keta halo ema sira hakbesik ami no la hetan hamnasa midar nia hakmatek, ka liafuan ida atu fó aten-barani, ka jestu ida konfiansa nian. Mai no hela ho ami.

KANTU:

L: Ha'u lori lia-konvite urjente ida atu hafoun diálogu kona-ba oinsá ita harii daudaun futuru planeta nian. Ita presiza debate ida ne'ebé haraik uniaun ba ita, tanba dezafiu ambientál, ne'ebé ita hasouru daudaun, no nia abut umana sira iha impaktu iha ita hotu nia moris (LS 14)

L2: Fil 4,4-7

Ida ne'ebé tinan kiik liu: Ne'e mak tempu ksolok boot nian, ita presiza hamutuk, ita iha rikusoin sira maibé, liuliu, ita bele konfia ba malu no tulun malu: ne'e mak ksolok loos, ida ne'ebé la bele falta. Tan ne'e, ohin ita sei hatán ba pergunta ida ne'e: saida mak halo lakon ita-nia ksolok?

H: Ami hakarak moris ho ksolok no esperansa, tanba Ita mak lori roman ne'ebé nabilan liu, damen kle'an liu no ksolok ne'ebé loos. Mai Na'i Jezús! Mai Na'i Jezús!

Kantu:

Ema ida sunu lilin dahuluk no komunidadade reza hamutuk orasaun ne'ebé tuir mai:

H: Iha nakukun laran roman ida mosu, ksolok hakonu laran. Haklaken liafoun di'ak: Na'i atu mai! Prepara ninia dalan bá, tanba Na'i besik ona! Prepara fuan hanesan noiva ida prepara an ba ninia kasamentu. Manu-ain mai ona! João Baptista la'ós roman, nia mak ida ne'ebé haklaken Roman. Ami ida-idak mós, hakarak sai Ita-nia ahi-oan atu leno, Ita-nia ahi atu hamanas, Ita-nia hamnasa midar atu ema bele hasoru Ita. Na'i, mai atu soi ami, envolve ami iha Ita-nia roman, hamanas ami ho Ita-nia domin!

